

**ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ՑԱՎԱԿՑԱԿԱՆ
ԳԻՐԸ ՀՈՒՅՆ ԵԿԵՂԵՑՈՒ ՍՈՒՐԲ ՄԻՆՈՂԻՆ ԵՎ ՀՈՒՅՆ
ԺՈՂՈՎՐԴԻՆ ՔՐԻՍՏՈՂՈՒԼՈՍ ԱՐՔԵՊԻՍԿՈՍԻ
ՄԱՀՎԱՆ ԱՌԻԹՈՎ**

Հունվարի 29-ին Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսը ցավակցական զիր է ուղղել Հույն Ուղղափառ Եկեղեցու Սուրբ Սինոդի անդամներին, Հունաստանի Հանրապետության նախագահին և Հույն Եկեղեցու բարեպաշտ ժողովրդին՝ Աթենքի և համայն Հունաստանի հոգևոր պետ՝ Նորին Ամենապատվություն Քրիստոդուլոս արքեպիսկոպոսի մահվան առիթով:

Հայոց Հայրապետի ցավակցագրում մասնավորապես ասվում է. *«Խորը վշտով տեղեկացանք, որ սույն թվականի հունվար 28-ին վախճանվեց Աթենքի և Համայն Հունաստանի հոգևոր պետ Նորին Ամենապատվություն Քրիստոդուլոս արքեպիսկոպոսը:*

Հանուն Հայաստանյայց Առաքելական Սուրբ Եկեղեցու և Գերագույն Հոգևոր Խորհրդի՝ Մեր ցավակցությունն ու սրտակցությունն ենք հայտնում Հույն Ուղղափառ Եկեղեցու Հոգևոր Սինոդին, Հունաստանի Հանրապետության նախագահին և Հույն Եկեղեցու բարեպաշտ ժողովրդին:

Քրիստոդուլոս արքեպիսկոպոսը գահակալության տասը տարիների ընթացքում իրականացրեց միջեկեղեցական բազում ձեռնարկումներ և նպաստեց քույր Եկեղեցիների միջև համագործակցության և փոխըմբռնման ընդլայնմանը, որի համար փառք և գոհություն ենք հայտնում մեր Տեր Հիսուս Քրիստոսին:

Ափսոսում ենք, որ առողջության վատթարացման պատճառով հնարավոր չեղավ Քրիստոդուլոս արքեպիսկոպոսի նախատեսված այցը Հայաստան և Մայր Աթոռ Սուրբ Էջմիածին՝ միասնաբար աղոթելու և առավել զորացնելու սիրո այն համագործակցությունը, որ առկա է Մեր քույր Եկեղեցիների և մեր բարեպաշտ ժողովուրդների միջև»:

Աթենքի և Համայն Հունաստանի հոգևոր պետի հուղարկավորության արարողություններին հանուն Ամենայն Հայոց Կաթողիկոսության մասնակցեց Հունաստանի Հայոց թեմի առաջնորդ Տ. Ոսկան արքեպիսկոպոս Գալփակյանը:

*ՄԱՅԸ ԱԹՈՌ ՍՈՒՐԲ ԷԶՄԻԱԾԻՆ
ՏԵՂԵԿԱՏՎԱԿԱՆ ՀԱՄԱԿԱՐԳ*